



NOGOMETNI SAVEZ FEDERACIJE BOSNE I HERCEGOVINE

PROPozICIJE
takmičenja/natjecanja
Prve i Druge ženske lige Federacije BiH
za takmičarsku/natjecateljsku sezonu 2018/2019

Sarajevo: juni/lipanj 2018.

Broj: 998-II/18
Sarajevo: 25.06.2018.

Izvršni odbor Nogometnog saveza Federacije BiH na osnovu člana 32. Statuta NS Federacije BiH, na sjednici održanoj 25.06.2018. godine u Sarajevu, a na prijedlog Komisije za takmičenje NS FBiH, donio je s l j e d e ć e:

PROPOZICIJE
takmičenja/natjecanja Prve i Druge ženske lige FBiH
za takmičarsku/natjecateljsku 2018/2019 godinu

OPĆE ODREDBE:

Član 1.

Ovim Propozicijama utvrđuje se način organiziranja i provođenja takmičenja za prvenstvo u Prvoj i Drugoj ženskoj ligi FBiH za seniorke za takmičarsku/natjecateljsku 2018/2019 godinu.

Član 2.

U takmičenju za prvenstvo Ženske lige Federacije Bosne i Hercegovine za takmičarsku 2018/2019 godinu sudjeluju klubovi sa područja Federacije BiH.

Ženska nogometna liga Federacije BiH za seniorke u takmičarskoj sezoni 2018/2019 odvijat će se u formi takmičenja Prve ženske lige Federacije BiH od osam klubova shodno plasmanu iz prethodne takmičarske sezone i Druge ženske lige FBiH od sedam klubova shodno plasmanu iz prethodne takmičarske sezone i prijavama novoformiranih klubova.

Član 3.

Organi takmičenja Prve i Druge ženske nogometne lige FBiH su:

- Komisija za takmičenje NS FBiH - rukovodi takmičenjem i određuje delegate,
- Komisija za suce i suđenje NS FBiH- određuje suce i analizira suđenje,
- Disciplinska komisija NS FBiH – rješava disciplinska pitanja i
- Apelaciona komisija- komisija za žalbe.

Član 4.

Takmičenje u Prvoj ligi Federacije se odigrava po dvostrukom bod sistemu i vremenski utvrđenom kalendaru sa dvije takmičarske/natjecateljske polusezone jesen i proljeće, a prvak Prve ženske nogometne lige Federacije BiH ostvarit će plasman u žensku Premijer ligu BiH.

Član 5.

Takmičenje u Drugoj ligi Federacije BiH se odigrava po dvostrukom bod sistemu i vremenski utvrđenom kalendaru sa dvije takmičarske/natjecateljske polusezone jesen i proljeće, a prvak Druge ženske nogometne lige Federacije BiH ostvarit će plasman u Prvu žensku ligu FBiH.

Član 6.

Takmičenjem rukovodi Izvršni odbor NS FBiH preko imenovanih organa.

Komisija za takmičenje/natjecanje NS FBiH registruje utakmice, donosi prvostepene odluke, rješava žalbe u prvom stepenu, rješava sva pitanja iz takmičarskog dijela, određuje delegate za utakmice, vrši analizu obavljanja delegatske dužnosti i dr.

Član 7.

Takmičenje/natjecanje u Prvoj i Drugoj ženskoj nogometnoj ligi FBiH administrativno se vodi kroz COMET informacijski sistem.

Na stadionu treba biti posebna prostorija za sastavljanje zapisnika. Na stadionima klubova i za utakmice Ženske lige u službenom prostoru za zapisnik, klub domaćin treba da obezbijedi:

- ispravan kompjuter sa štampačem i ispravnom internet konekcijom za potrebe COMET informacionog sistema.
- ispravna telefonska linija i telefaks

Član 8.

Kalendar takmičenja donosi Izvršni odbor NS FBiH. Utvrđeni kalendar takmičenja ne može se mijenjati osim u slučaju više sile. U tom slučaju organ koji vodi takmičenje može izvršiti promjenu termina i satnice pojedine utakmice ili cijelog kola.

Sve utakmice igraju se u pravilu subotom/nedjeljom, prema unaprijed utvrđenoj satnici.

Klub domaćin obavezan je najkasnije do srijede do 12 sati izvršiti najavu utakmice te o tome obavijestiti protivnički klub. U slučaju nenajavljene utakmice, Komisija za takmičenje NS FBiH će utakmicu zakazati prema usvojenom kalendaru takmičenja.

Raspored utakmica za prvenstvo Prve i Druge ženske nogometne lige FBiH određuje se žrijebom takmičarskih/natjecateljskih klubova sudionika i primjenom „Bergerove tablice“.

Član 9.

Nakon utvrđenog rasporeda takmičenja/natjecanja za prvenstvene i kup utakmice, klubovi su obavezni u roku od pet (5) dana da dostave u Sekretarijat za takmičenje:

- naziv igrališta na kome će igrati utakmice;
- mjesto odigravanja utakmica;
- boju dresova (dres, šorts i štucne), kao i rezervnu boju sa kojom će klub nastupati;
- dan odigravanja utakmica (subota ili nedjelja).

PROMJENA TERMINA UTAKMICA:

Član 10.

Promjena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen Komisiji za takmičenje/natjecanje NS FBiH, najkasnije osam (8) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina utakmice s priloženom dokumentacijom iz koje se može utvrditi opravdanost podnesenog zahtjeva sa eventualnim prijedlogom za novi termin odigravanja utakmice.

U slučaju kada zahtjev za promjenu termina nije podnesen u skladu sa prethodnim stavom, Komisija za takmičenje/natjecanje može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba, što je moguće najkasnije tri (3) dana prije utvrđenog termina utakmice.

Kada se utakmica odlaže zbog bolesti igračica (trovanja i slično), to se može učiniti ukoliko je bolesno najmanje 7 (sedam) standardnih igračica (igračice koje su odigrale najmanje 70% utakmica) u toku tekućeg jesenjeg ili proljetnog dijela prvenstva.

Kada Komisija za takmičenje NS FBiH dobije pismeni zahtjev kluba za odgodu utakmice zbog bolesti igračica sa kompletnom validnom medicinskom dokumentacijom iz odgovarajuće medicinske ustanove (uredan, čitljiv i tiskan elektronski nalaz nadležnog specijaliste, dijagnoza, mišljenje o dužini bolovanja i sl.), donijet će odluku o odgodi utakmice, uz mogućnost traženja mišljenja od Komisije za sportsku medicinu NS FBiH.

Kada je došlo do promjene termina utakmice, Komisija za takmičenje NS FBiH će donijeti odluku da se ona odigra u prvom slobodnom terminu (ako su prestali razlozi zbog koje je utakmica odgođena), pod uslovom da svaki klub ima najmanje dva slobodna dana između odigravanja dvije utakmice.

OBAVEZE KLUBOVA:

Član 11.

Klub domaćin utakmice je obavezan pripremiti teren za igru, kao i sve ostale prostorije (svlačionice, kancelarije i sl.), da su čiste, zagrijane, sa toplom vodom, opremljene sa svim tehničkim pomagalima najkasnije 90 (devedeset) minuta prije određenog termina za početak utakmice.

Organizaciju utakmice provode klubovi koji igraju na domaćem terenu i obavezni su brinuti se o uspjehu organizacije utakmice. Klub domaćin isključivo je nadležan za red i sigurnost prije, tokom i nakon utakmice i bit će pozvan na odgovornost zbog bilo kojeg incidenta, te može biti kažnjen u skladu sa odredbama Disciplinskog pravilnika NS/FS BiH.

Svi klubovi obavezni su nastupiti u svojim najboljim sastavima.

Za odigravanje utakmice klub je dužan osigurati tri (3) ispravne lopte koje po svemu odgovaraju propisima.

Klubovi su obavezni doći na stadion na kome će se odigrati utakmica najkasnije 60 (šezdeset) minuta prije utvrđenog vremena za početak utakmice i nastupiti sa najboljim sastavom ekipa, te prisustvovati radnom sastanku (brifingu) kojim predsjedava delegat utakmice.

Član 12.

Klub domaćin obavezan je najkasnije četiri dana prije odigravanja utakmice obavijestiti NS FBiH o tačnom terminu odigravanja utakmice.

Klub domaćin obavezan je poduzeti sve mjere za sigurnost sudaca, delegata i gostujuće ekipe i to prije, za vrijeme i nakon odigravanja utakmice sve do napuštanja sportskog objekta.

Klub domaćin obavezan je na svim utakmicama osigurati liječničku službu i adekvatno vozilo radi pružanja hitne pomoći, koje mora biti u neposrednoj blizini igrališta i u slučaju potrebe obaviti prijevoz do zdravstvene ustanove.

Klub domaćin utakmice obavezan je obezbijediti odgovarajuću dežurnu redarsku službu s propisno označenim dovoljnim brojem redara/zaštitara zaštitarske organizacije, pripadnike policije, liječnika i dežurno sanitetsko vozilo sa suvozačem, osobljem i nosilima, kao i najmanje 4 (četiri) propisno označena sakupljača lopti, ravnomjerno raspoređenih uz ogradu tribina stadiona, kao i zadužiti posebno lice za njihov rad.

Bez pismenog odobrenja nadležne policijske stanice i prisustva pripadnika policije, dežurne ljekarske službe, sanitetskog vozila, sanitetskih nosila i redarske službe utakmica se neće igrati. Odluku o neodigravanju utakmice donosi delegat utakmice i saopštava je sudiji utakmice i zvaničnim predstavnicima klubova, prije početka utakmice i sve to evidentira u izvještaju delegata utakmice i zapisniku sa utakmice.

Klub domaćin obavezan je podnijeti pismenu prijavu i tražiti odobrenje za održavanje javnog skupa utakmice nadležnoj policijskoj upravi Ministarstva unutrašnjih poslova, na čijoj teritoriji se treba odigrati utakmica, navodeći sve relevantne podatke, a posebno: mjesto i naziv stadiona, vrsta utakmice, imena klubova, datum i vrijeme odigravanja utakmice, kao i procjenu mogućeg broja gledalaca, kako domaćih, tako i gostujućih, ako su najavljeni, te podatke o angažovanim ostalim službama, redarska, ljekarska, sa orijentacionim brojem lica, te druga neophodna saznanja u vezi sa organizacijom utakmice.

Pismeni zahtjev za odobrenje odigravanja utakmice podnosi se najkasnije 72 (sedamdestdva) sata prije određenog termina za odigravanje utakmice ili u rokovima kojima je regulisano ovo pitanje nadležnih organa bezbjednosti u mjestu odigravanja utakmice.

Pismeno odobrenje za odigravanje utakmice klub domaćin obavezno dostavlja na uvid delegatu utakmice prije njenog početka, odnosno na brifingu.

Klub domaćin za neispunjavanje ovih obaveza snosi takmičarske i disciplinske posljedice u skladu sa Pravilnikom o nogometnim takmičenjima NS/FS BiH i Disciplinskim pravilnikom NS/FS BiH.

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

Član 13.

Klub domaćin obavezan je na jarbole izvjesiti Državnu zastavu BiH i zastavu NS/FS BiH. Moguće je postaviti zastave Federacije BiH i klubova. Postavljanje ostalih zastava nije dozvoljeno. Istaknute zastave trebaju biti istih dimenzija.

Član 14.

Klubovi Prve i Druge ženske lige Federacije BiH obavezni su vršiti snimanje svih domaćih utakmica.

Uz teren ili na tribinama, za snimatelja utakmice mora biti izrađeno uzvišeno i potpuno zaštićeno od vremenskih neprilika i publike mjesto minimalne visine 3,0 metra, na poziciji središnje crte igrališta kako bi se mogao pokriti cijeli teren za snimanje.

Snimanje utakmica regulisano je posebnim uputstvom o snimanju utakmica izdatim od strane NS FBiH.

Klub domaćin Prve i Druge ženske obavezan je omogućiti snimanje utakmice zainteresiranom klubu-gostu pod prijetnjom disciplinskih sankcija.

Član 15.

Za vrijeme odigravanja prvenstvenih utakmica u stadionu, pored terena za igru, u tehničkom prostoru moraju se nalaziti lica akreditovana od strane NS FBiH ili NS/FS BiH za takmičenje Prve i Druge ženske lige Federacije BiH, i to:

1. Predstavnik kluba,
2. Trener,
3. Igrači,
4. Ljekar ili fizioterapeut kluba,

Svi klubovi Prve i Druge ženske lige FBiH obavezni su imati minimalno jednog glavnog ili pomoćnog trenera za odgovarajućom trenerskom akreditacijom izdatom od strane Centra za edukaciju kadrova NS/FS BiH.

Na utakmicama Prve ženske lige Federacije BiH mogu biti treneri sa PRO, A, ili B takmičarskom akreditacijom.

Na utakmicama Druge ženske lige Federacije BiH mogu biti treneri sa PRO, A, B ili C takmičarskom akreditacijom. C takmičarska akreditacija validna je za takmičarsku sezonu 2018/2019.

U igralištu s unutarne strane ograde mogu se još nalaziti:

- dežurno vozilo za hitne slučajeve;
- nosači nosila;
- dovoljan broj skupljača lopti u sportskoj opremi različitoj od boje opreme timova;
- redarska služba.

Član 16.

Svaki klub na utakmicama stalnog takmičenja mora odrediti zvaničnog predstavnika kluba. Predstavnik kluba mora prisustvovati redovnim seminarima NS FBiH i mora biti akreditiran od strane NS FBiH.

Predstavnik kluba ne može biti trener ekipe koji je dobio akreditaciju u toj takmičarskoj godini, niti trener koji je u toj takmičarskoj godini dobio akreditaciju za vođenje drugog kluba.

Predstavnik kluba za vrijeme odigravanja utakmice mora imati istaknutu akreditaciju izdatu od strane NS FBiH.

NASTUP IGRAČICA:

Član 17.

Utakmica ne može da počne ako jedan od timova ima manje od 7 (sedam) igračica, shodno članu 40. Pravilnika o nogometnim takmičenjima/natjecanjima NS/FS BiH i pravilu III Pravila nogometne igre. Igračice koje nisu upisani do početka utakmice u zapisnik, ne mogu nastupati na utakmici.

Ako jedan tim za vrijeme trajanja utakmice ostane sa manje od 7 (sedam) igračica, sudac je dužan zaustaviti igru, a ako u roku od 5 (pet) minuta klub ne nastupi s minimalnim brojem igračica, sudac

je dužan da odsvira kraj utakmice, shodno članu 41. Pravilnika o nogometnim takmičenjima NS/FS BiH i pravila III Pravila nogometne igre.

Svaki klub prijavljuje u zapisnik 18 (osamnaest) igračica. U igri sudjeluje 11 (jedanaest) prijavljenih igračica, a tokom utakmice klubovi Prve ženske lige FBiH mogu izvršiti 3 (tri) zamjene, a klubovi Druge ženske lige FBiH mogu izvršiti 5 (pet) zamjena.

Klubovi koji nemaju minimalno 14 (četnaest) igračica u zapisniku utakmice snosit će disciplinske sankcije.

Predstavnici klubova obavezni su dostaviti delegatu sastav ekipa sa ispravnim igračkim legitimacijama i akreditacijama službenih osoba kluba, najkasnije 60 minuta prije početka utakmice na posebno izrađenom obrascu izdatom od strane NS FBiH.

Spisak mora biti ovjeren i potpisan od zvaničnog predstavnika kluba. Spisak prijavljenih igračica mora sadržavati podatke svih igračica prijavljenih u COMET sistemu.

Klubovi Prve ženske lige Federacije BiH mogu sa igračicama zaključiti amaterske ugovore, koji moraju biti uneseni u COMET informacioni sistem i ovjereni od strane Nogometnog saveza Federacije BiH.

Član 18.

Na utakmicama Prve i Druge ženske lige FBiH imaju pravo nastupa sve pravilno registrirane igračice koje su navršile 16 godina života i stekle pravo nastupa na prvenstvenim ili Kup utakmicama. Izuzetno, na prvenstvenim utakmicama mogu nastupiti i igračice koje su navršile 14 godina života sa specijalističkim liječničkim pregledom, s tim što najviše pet igračica sa 14 godine mogu u isto vrijeme biti na terenu za igru.

Na utakmicama Druge ženske lige FBiH imaju pravo nastupa sve pravilno registrirane igračice koje su navršile 16 godina života i stekle pravo nastupa na prvenstvenim ili Kup utakmicama. Izuzetno, na prvenstvenim utakmicama mogu nastupiti i igračice koje su navršile i 13 godina života sa specijalističkim liječničkim pregledom, s tim što najviše pet igračica sa 13 godina mogu u isto vrijeme biti na terenu za igru.

Igračice ne mogu u jednom danu nastupiti na dvije utakmice.

Na prvenstvenim utakmicama nemaju pravo nastupa igračice koje su pod suspenzijom, kaznom zabrane igranja.

Automatsku kaznu zabrane igranja jedne prvenstvene utakmice nastalu zbog tri javne opomene, igračica izdržava na prvoj narednoj prvenstvenoj utakmici.

Član 19.

Sve igračice moraju imati sportsku iskaznicu sa ubilježnim datumom i ovjerenim ljekarskim pregledom (pečat) od strane Zdravstvene ustanove koja je određena za pregled sportista. Izuzetno, igračica može imati zvaničnu ljekarsku potvrdu (sa tačnim datumom i pečatom ljekara i ustanove) o izvršenom ljekarskom pregledu u navedenoj zdravstvenoj ustanovi, što se može primijeniti izuzetno i samo za jednu utakmicu nakon čega pregled mora biti upisan u legitimaciju.

Ljekarski pregled važi 6 (šest) mjeseci, a za igračice mlađe od 17 godina 4 (četiri) mjeseca.

Igračica koja nije upisana u zapisnik utakmice, ili koja nije izvršila ljekarski pregled, ne može nastupati na prvenstvenim utakmicama.

Protiv kluba i igračice koji prekrši odredbe ovog člana bit će pokrenut disciplinski postupak prema odredbama Disciplinskog pravilnika NS/FS BiH.

Također, na svim utakmicama igračice moraju imati uredne sportske iskaznice izdate od strane nadležnog organa za registraciju sa ovjerenom članarinom za tekuću godinu.

Član 20.

Klub može imati više registrovanih igračica stranih državljanke, s tim što najviše 4 (četiri) igračice strane državljanke mogu biti upisane u zapisnik i imaju pravo nastupa na jednoj utakmici.

U slučaju nastupanja većeg broja stranih igračica, suprotno navedenom stavu ovog člana utakmica će biti registrovana službenim rezultatom (3:0) par forfe za protivnika u skladu sa članom 76. stav 3. Pravilnika o nogometnim natjecanjima NS/FS BiH ili drugim odgovarajućim članom ukoliko dođe do izmjene Pravilnika, a klub će snositi disciplinsku odgovornost.

Shodno Pravilniku o registraciji NS/FS BiH, u toku takmičarske sezone klub može po osnovu ustupanja registrirati najviše četiri igračice, s tim što najviše tri mogu nastupiti na jednoj utakmici.

IDENTITET IGRAČICA:

Član 21.

Na prvenstvenim utakmicama mogu nastupiti samo igračice čiji je identitet utvrđen putem sportske legitimacije izdate od nadležnog organa za registraciju, a u slučaju njenog nedostatka identitet će se utvrditi na osnovu javne isprave: lične karte ili pasoša.

Ukoliko se identitet igračice utvrđuje na osnovu javne isprave, klub je obavezan na zahtjev Komisije za takmičenje dostaviti u Sekretarijat NS FBiH sportsku legitimaciju u roku od 24 sata. Delegat će navesti broj osobne iskaznice ili putovnice, a u izvještaj i sve ostale relevantne podatke (matični broj, datum rođenja i dr.).

Identitet se u pravilu utvrđuje prije početka utakmice.

Za igračice koje su zakasnile na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

DRESOVI:

Član 22.

Klubovi moraju poštivati boju sportske opreme kluba protivnika, koje su prijavljeni prije početka prventva u Sekretarijat saveza i objavljena u biltenu NS FBiH.

Ekipe na jednoj utakmici ne mogu igrati u istim ili sličnim bojama dresova. U protivnom, dresove će promijeniti domaća (prvoimenovana) ekipa, a delegat utakmice će gostujući klub prijaviti zbog zanemarivanja obaveza i isti će snositi disciplinsku odgovornost.

Brojevi na dresovima moraju odgovarati onima na popisu igrača u Zapisniku o utakmici.

Ako su dresovi prugasti ili šareni, brojevi moraju biti na jednobojnoj podlozi

Svi klubovi obavezni su organu takmičenja 15 dana prije početka takmičenja u pismenoj formi prijaviti osnovnu i rezervnu boju opreme u kojoj će se takmičiti.

NEODIGRAVANJE, PREKID UTAKMICE I NENASTUPANJE RADI SUSPENZIJE:

Član 23.

Ako u roku od 15 minuta od određenog vremena za početak utakmice stalnog natjecanja jedan tim ne nastupi sa potrebnim brojem igračica, sudac će priopćiti kapitenu tima koji je nastupio da se utakmica neće odigrati i to će upisati u zapisnik.

Izuzetno, u slučajevima da klub nije mogao da nastupi uslijed više sile, sudac će sačekati i nešto duže, ali će voditi računa o tome da utakmica može da se završi na vrijeme.

Ukoliko je utakmica prekinuta iz razloga više sile, a prije isteka 80 % regularnog vremena, ili nije odigrana, natjecateljski organ će utvrditi novi termin za odigravanje utakmice.

SLUŽBENA LICA UTAKMICE:

Član 24.

Za svaku utakmicu Komisija za takmičenje NS FBiH određuje delegata koji zastupa rukovodstvo i ima vrhovni nadzor na utakmici. Delegat je dužan doći na igralište 60 minuta prije termina utakmice. Dužan je putem igračkih legitimacija ili na drugi način utvrđen Pravilnikom o nogometnim takmičenjima obaviti pojedinačnu identifikaciju svih igračica prijavljenih za utakmicu.

Delegat utakmice Ženske nogometne zapisnik i izvještaj sa utakmice dostavlja kroz COMET sistem a ostalo prema posebnom uputstvu takmičarskog organa.

Delegat na utakmici je obavezan u roku od 24 sata po odigranoj u COMET informacionom sistemu zaključiti izvještaj

Ukoliko na klub na stadionu ne posjeduje računar sa internet konekcijom, delegat će zapisnik sa utakmice sastaviti ručno, te u roku od 24 sata podatke unijeti u COMET informacioni sistem.

Delegat utakmice dužan je sačuvati dostavljene sastave igrača, te na traženje nadležnih komisija iste dostaviti u Sekretarijat takmičenja.

Član 25.

Sudac izvještaj piše u COMET informacionom sistemu. Sudac je obavezan sa delegatom utakmice sačiniti zapisnik, te provjeriti vjerodostojnost unosa podataka u COMET informacionom sistemu. Sudija je dužan da nakon utakmice u svom izvještaju navede podatke koje se odnose na postignute pogotke, opomenute i isključene igrači, a prema potrebi i druge podatke, ako se radi o prekidu utakmice, neredu, tuči, uključujući eventualne prijave i sl.

Član 26.

Prvenstvene utakmice Ženske nogometne lige sude ispitani/e sutkinje i nogometni suci.

Prilikom delegiranja vodit će se računa o tome da što više utakmica sude sutkinje u cilju sticanja iskustva. Sutkinje/sudije određuju članovi Komisije za suce i suđenje koji ne sudjeluju u delegiranju sudaca Prve lige FBiH.

ZABRANA NASTUPA ZBOG SUSPENZIJE:

Član 27.

Suspendovani tim ne može nastupiti na javnoj utakmici sve dok traje suspenzija. Suspendovani igrači ne mogu nastupiti sve dok traje suspenzija.

Sve odigrane utakmice u vrijeme suspenzije izrečene radi neizvršavanja pravosnažnih odluka nadležnih organa ili neizvršenja nespornih obaveza nastalih iz natjecanja predviđenih ovim Propozicijama, registrirat će se 3:0 (par-forfe) u korist protivnika.

REGISTRACIJA UTAKMICE:

Član 28.

Komisija za takmičenje/natjecanje NS FBiH vrši registraciju svih neodigranih ili prekinutih utakmica Ženske lige FBiH, a uzimajući u obzir sve relevantne činjenice za registraciju utakmice. Ako na utakmicu nije uložena žalba, a ne postoje uvjeti za registraciju po službenoj dužnosti sa 3:0 (par-forfe), utakmica se registrira postignutim rezultatom.

Ako je prvostupanjska odluka pravosnažna, ili je donesena drugostupanjska odluka koja je konačna, jednom registrirana utakmica ne može biti poništena, izuzev u postupku pred Izvršnim odborom NS Federacije BiH.

Komisija za takmičenje NS FBiH vrši registraciju odigranih utakmica najkasnije u roku od 21 dan od dana odigravanja tih utakmica.

Ako je uložena žalba, rok za registraciju utakmice produžava se do konačne odluke.

ŽALBE I ODLUČIVANJE PO ŽALBAMA:

Član 29.

O regularnosti utakmice stalnog takmičenja može se rješavati na osnovu žalbe oštećenog kluba i izvještaja službenih lica.

Pod oštećenim klubom u smislu prethodnog stava podrazumijeva se svaki klub koji je oštećen rezultatom utakmice na koju se ulaže žalba.

Žalbe po svim osnovama moraju se telegrafski ili faksom najaviti u roku od 24 sata po odigranoj utakmici, a pismeno obrazloženje sa dokazom o uplaćenju taksi utvrđenoj odlukom i ovim propozicijama, ima se dostaviti u roku od 48 sati po odigranoj utakmici.

Ukoliko rok za najavu i ulaganje žalbe ističe u nedjelju ili na državni praznik, rok za najavu i ulaganje produžava se za prvi naredni radni dan.

Žalba se dostavlja nadležnom takmičarskom organu u dva primjerka.

Član 30.

Neblagovremeno najavljene, neobrazložene, netaksirane ili nedovoljno taksirane žalbe neće se uzimati u postupak, već će se odbaciti, a utakmica će se registrirati postignutim rezultatom.

Član 31.

Za utakmice Ženske nogometne lige Federacije BiH, o žalbama u prvom stupnju odlučuje Komisija za takmičenje/natjecanje.

Član 32.

Žalba na prvostupanjsku odluku podnosi se Apelacionoj komisiji nogometnog saveza Federacije BiH u roku od osam (8) dana od dana prijema pismene odluke prvostupanjskog organa, uz dokaz o uplaćenju taksu, shodno odluci IO NS FBiH o iznosu taksu, a shodno članu 73. stav 4. Pravilnika o nogometnim takmičenjima, rok za žalbu može biti i skraćen ukoliko je to neophodno zbog sportskih razloga, a prema odluci nadležnog organa NS Federacije BiH.

Drugostupanjska odluka je konačna.

Protiv odluke drugostupanjskog organa, može se podnijeti zahtjev za zaštitu zakonitosti, Izvršnom odboru nogometnog saveza Federacije BiH u roku od osam (8) dana od dana prijema odluke drugostupanjskog organa.

DISCIPLINSKE ODREDBE:

Član 33.

O disciplinskim prekršajima igračica, službenih predstavnika (trener, ljekar, fizioterapeut, zvanični predstavnik kluba, komesar za sigurnost) i klubova koji sudjeluju u natjecanju, odlučuje se na osnovu Disciplinskog pravilnika NS/FS BiH i posebnih odluka IO NS FBiH.

Drugostepene odluke po žalbama na odluke disciplinskog organa donosi Apelaciona komisija.

Drugostepene odluke o disciplinskim prekršajima su konačne.

Protiv odluke drugostepenog organa, može se podnijeti prijedlog za zaštitu zakonitosti.

Automatska kazna zabrane igranja jedne prvenstvene ili kup utakmice nastaje poslije svake treće javne opomene koju igrač dobije na prvenstvenoj ili kup utakmici u toku jedne natjecateljske godine, a automatski prestaje poslije prvenstvene ili kup utakmice na kojoj je igrač morao da pauzira, pa i u slučaju nastupa igrača pod automatskom kaznom na toj utakmici.

Javne opomene (žuti karton) radi kojih je igračica dobila crveni karton ne evidentira se, evidentira se samo crveni karton.

UTVRĐIVANJE PLASMANA:

Član 34.

Plasman klubova na tabeli utvrđuje se prema odredbama člana 46. Pravilnika o nogometnim takmičenjima NS/FS BiH.

Prvak Prve ženske lige Federacije na kraju takmičarske/natjecateljske 2018/2019 godine prelazi u viši rang- Premijer žensku ligu BiH.

Prvak grupe Druge ženske lige Federacije na kraju takmičarske/natjecateljske 2018/2019 godine prelazi u viši rang – Prvu žensku ligu Federacije BiH.

POPUNJAVANJE LIGE

Član 35.

Prvu žensku ligu Federacije BiH u takmičarskoj sezoni 2019/2020 popunjava klub prvak Druge ženske lige FBiH.

Na kraju takmičarske sezone 2018/2019, Prvu žensku ligu Federacije BiH napustit će onoliko klubova koliko je potrebno da Prva ženska liga FBiH u takmičarskoj sezoni 2019/2020 broji 8 klubova.

Novoformirani ženski klubovi ostvarit će plasman u Drugu žensku ligu Federacije BiH, vodeći računa o regionalnoj podijeljenosti i ispunjavanju svih potrebnih uslova.

Izvršni odbor NS Federacije BiH može donijeti odluku o formiranju dvije grupe Prve ženske lige Federacije BiH od takmičarske sezone 2019/2020 a zavisno od konačnog broja prijavljenih klubova.

FINANSIJSKE ODREDBE:

Član 36.

Kotizacija za takmičenje Prve ženske nogometne lige Federacije BiH za seniorke iznosi 1.200 (hiljadudvijestotine) KM, a Kotizacija za klub Druge ženske nogometne lige FBiH za seniorke 1.000 (jednuhiljadu) KM.

Kotizacija se utvrđuje za cijelu takmičarsku/natjecateljsku sezonu.

Klubovi su olobođeni plaćanja 50 % troškova kotizacije za takmičenje koji će biti uplaćeni iz sredstava za razvoj ženskog nogometa.

Uplata preostalih 50 % kotizacije (600 KM po klubu Prve lige FBiH i 500 KM po klubu Druge lige FBiH) može se izvršiti u dva jednaka dijela, s tim što se prvi dio uplaćuje najkasnije petnaest (15) dana prije početka jesenjeg, a drugi dio najkasnije petnaest (15) dana prije početka proljetnog dijela prvenstva.

Ukoliko klub odustane od takmičenja u toku takmičarske/natjecateljske sezone, obavezan je izvršiti uplatu kotizacije za takmičenje/natjecanje u cijelosti.

Neizvršenje obaveza povlači disciplinske posljedice u skladu sa odredbama Disciplinskog pravilnika NS/FS BiH.

Član 36.

Službenim licima na utakmici pripada odgovarajuća naknada, koja uključuje taksu, dnevnicu i putne troškove, u skladu sa odlukom Izvršnog odbora NS FBiH.

Sve isplate vrše se poslije odigravanja utakmica, najkasnije 24 sata po odigranoj utakmici, obavezno na žiro račune službenih osoba.

Ukoliko klub ne isplati službena lica ili ih djelomično isplati, klubu se ostavlja dodatni rok od 24 sata da izmiri troškove, nakon čega nastupa suspenzija do izmirenja obaveza u cijelosti, te klub podliježe novčanoj kazni za neizvršavanje obaveza.

Klub je dužan validan dokaz o isplati naknada za službena lica, dostaviti delegatu na brifingu prije početka prve naredne utakmice.

Delegat je dužan na brifingu, prije početka utakmice, izvršiti provjeru da li je klub isplatio pripadajuće naknade svakom službenom licu pojedinačno što se odnosi na prethodnu utakmicu.

Klub neće moći odigrati narednu utakmicu ukoliko delegatu utakmice ne dokaže da je finansijska obaveza sa prethodne utakmice (naknade) izmirena u cijelosti.

Član 37.

Za sve što nije predviđeno ovim Propozicijama, vrijede odredbe Pravilnika o nogometnim takmičenjima i Disciplinskog pravilnika, te ostalih propisa NS/FS BiH.

Član 38.

Propozicije stupaju na snagu danom donošenja, a primjenjuju se za 2018/2019 natjecateljsku godinu.

P R E D S J E D N I K

Irfan Durić